

18. oktober

Inatsisartut aalajangiiffigisassaattut siunnersuut Naalakkersuisut peqquneqassasut, aalisarnerup iluani tunitsivinni tunisat tamaasa oqimaassutsinut akigitat ingerlaavartumik saqqummiuneqartalernissaat anguniarlugu internikkut portalimut pilersitsinissamik nalunaarusiamik 2018 ingerlarnerani agguaassissasut. Nalunaarusiami nalilersuinerit, suliassat pilersitsinissamut tunngasut, naleqqussaaajuarnissamullu aningaasartuutissat ilanngunneqassapput, portali qanoq aaqqissuunneqarsinnaanersoq – kiisalu inuussutissarsiummut tunngatillugu aningaasarsiornermut unammilleqatigiinnermullu qanoq kinguneqarsinnaanera ilaatinneqassallutik.

(Inatsisartunut ilaasortaq Henrik Fleischer, Partii Naleraq)

Inatsisartunut ilaasortap Henrik Fleischerip Inatsisartunut aalajangiiffigisassatut siunnersuutaanut Siumumiit imaattumik oqaaseqaateqassaagut:

Siunnersuuteqartup anguniarpaa aalisakkanik tunisinermi toqqaannartumik atortorissaarutit elektroniskiusut atorlugit tamanut ammasumik nalunaarsuisoqartalernissaa siunertaralugu pilersitsinissamik nalunaarusiortoqassasoq 2018-ip ingerlanerani agguanneqartussa.

Tamanna isuma pitsaasutut isigaarput. Tamanna ammaneruleritsisussatut isigaarput.

Siumumiit isumaqarpugut nalunaarusiamik suliaqartitsinani internet portalimik aallaqqaataaniit pilersitsisoqassasoq. Taamaattumik matuma siunnersuutip aappassaaneerseqartinnani ataatsimiitsitaliami allannguutissatut siunnersuummik suliaqartoqarnissaa ujartorparput.

Taama oqaaseqarluta Inatsisartunut ilaasortap Henrik Fleischerip aalajangiiffigisassatut siunnersuutaa ataatsimiitsitaliami susassaartumi suliareqqaarlugi aappassaaneerseqarnissaa Siumumit inassutigaarput.

Ineqi Kielsen
Siumut